



En chasa federal è vegni discutà dal chonv. KEYSTONE

Legalisar il cannabis – il pievel ha l'ultim pled

DA CLAUDIA CADRUVI / ANR

■ **È il joint prest legal – exact sco la gerosa suenter la lavur? Il cussegl naziunal ha debattà ier trais uras davart l'iniziativa da chonv, ma el votescha pir l'emna proxima.** Enturn quaranta orators han discurrì ier en il cussegl naziunal. Ils sanesters, ils verds ed intgins politichers da la pld èn s'exprimids per l'iniziativa da chonv. La pps ha tegnì encunter. En quest connex ha *Jaqueline Fehr* (pd/ZH) constatà ch'il cannabis saja pli baud stà la droga d'in moviment, che ha battì cunter la «società etablidada». Per quest motiv vegnia il cannabis anc oz cumbattì cun vehemenza da l'ala dretga. I saja sco ina dolur-fantom politica. Malgrà ch'il problem saja gia daditg vargà, resentschertschertschertgels para anc adina las dolurs.

Alcohol e cannabis

«La politica da scumonds ha disdi», ha *Hans-Jürg Fehr* (ps/SH) ditg. En Svizra dettia quai bieras persunas che consume schian cannabis, ed i existia ina malgista stadad eclatanta tranter ils consumers d'alcohol e quels da cannabis. Il tubac ed igl alcohol sajan lubids, ed i saja schizunt lubì da far reclama per alcohol. Cun il cannabis procedia la politica exact il cuntrari. I sa tractia qua d'ina schizofrenia politica.

Simon Schenk (pps/BE) ha ditg ch'il consum da cannabis augmenta il risiko per obtegnair ina psicosa. *Oskar Freysinger* (pps/VS) ha ditg ch'el averteschia adina ses scolars ch'il cannabis reduceschia la capacita da la memoria curta (Kurzzeitgedächtnis).

Marina Carobbio (ps/TI) ha en quest connex fatg attent ch'era la droga legala alcohol chaschunia bliers problems psychics.

Proteger la giuventetgna

Tuttas drogas sajan privludas ed ils consumers da cannabis daventian adina pli giuvens, ha *Yvan Perrin* (pps/NE) avertì. I na saja betg bun da legalisar uss anc ina nova droga, mo perquai che autras drogas sco l'alcohol sajan lubidas.

I vegnia dà ora milliuns per la preven-

ziun da drogas, ha *Christian Wasserfallen* (pld/BE) ditg. Perquai fissi paradox d'uss anc lubir ina nova droga cun questa iniziativa.

«Sch'ins di ad in giuven da 15 onns, ch'il scumond al protegja dal cannabis, lura ri el a Vus en fatscha», ha ditg *Ignazio Cassis* (pld/TI). El è medi chantunal ed ha pledà per l'iniziativa, perquai ch'ella lubescha il consum da cannabis als creschids, ma cuntogna era perscripziuns per proteger la giuventetgna.

Il scumond, la polizia e la repressiun

I saja bun, sche giuvens vegnan arrestads da la polizia pervi da cannabis, ha *Christian Waber* (pps/BE) ditg. «Jau n'avess nagut encunter, sche mes uffants vegnissan interrogads pliras uras da la polizia, sch'els avessan fimà.» En la medema crena ha dà *Ernst Schibli* (pps/ZH). «I na dastga betg esser ch'ils umans vegnan fatgs dependents da drogas.» Sulet l'abstinenza totala saja la risposta sin la misergia da drogas.

En Svizra dettia quai onn per onn 30 000 denunzias tar la polizia pervi da cannabis. La polizia avessi bain auter da far che da far chatscha sin «kiffers». Il chonv na saja nagin privel per la segirtad interna da la Svizra, ha *Franziska Teuscher* (verds/BE) ditg. Auters orators han fatg attent sin la scena da drogas averta ils onns novanta a Turitg. Lezza saja vegnida chaschunada entras repressiun e saja pli tard svani cun la midada en la politica da drogas.

Cannabis – in factor economic

Jean Henri Dunant (pps/BS) ha ditg che la vendita da cannabis en Svizra cuntanschia ina svieuta dad ina milliarda francs l'onn. El è s'exprimì cunter l'iniziativa. Auters han fatg valair ils factors economics per motivar ina legalisaziun.

Christa Markwalder (pld/BE) ha ditg che la situaziun dad oz promovia las structuradas illegalas e da mafia. Cun l'iniziativa pudess il stadi schliar la vendita da cannabis a moda sumeglianta sco l'alcohol e gudagnass quattras entradas.

Alec von Graffenried (verds/BE) ha fatg attent che la mafia en l'America haja gudagnà ils pli bliers daners en quels onns ch'il alcohol saja stà scumandà. Uschia profiteschia era la fiera naira en Svizra dal scumond da cannabis.

A la fiera naira na possian ins betg cumandar a tgi ch'els dastgian vender cannabis, ha *Bastien Girod* (verds/ZH) fatg attent. Cun la legalisaziun pudessan ins dentant introducir perscripziuns – era pertutgant il cuntegn da THC.

Il process politic

L'emna proxima cuntinua la debatta davart l'iniziativa. Il cussegl naziunal vegn a decider, sch'el duai recumandar al pievel l'iniziativa u betg. Suent vegn l'iniziativa tractada en il cussegl dals chantuns. Lez prepara eventualmain ina cuntraproposta. Il davos pled en chapitel ha il pievel.

Tge pretenda l'iniziativa?

Il schaner 2006 è l'iniziativa vegnida inoltrada tar la chanzlia federala. Il tittel da l'iniziativa: «Iniziativa per ina politica da chonv raschunaivla e cun ina protecziun da giuventetgna efficients.»

L'iniziativa pretenda: Il consum, la cumpra ed il possess (per l'agen diever) da la substanza psicoactiva dal chonv duain esser libers da chastis. I duai es-

ser lubì da plantar chonv per l'agen diever. La confederaziun duai relaschar reglamentaziuns davart la cultivaziun ed il commerzi cun chonv e cun sias substanzas psicoactivas. La confederaziun procura ch'i vegn tegnì quint a las mesiras pertutgant la protecziun da giuventetgna. Plinavant è la reclama per substanzas da chonv scumandada.